

ОУВС-ийн суурин төлөөлөгч Пармершвар Рамлоган:

ТӨСВИЙН ТОДОТГОЛ ХИЙВЭЛ БОДЛОГЫН ХҮҮГ НЭМЭХЭЭС ӨӨР АРГАГҮЙ

Хэрэв Засгийн газар 2011 оны төсөвт тодотгол хийн, зарлагаа нэмбэл Монголбанк бодлогын хүүгээ одоо байгаагаасаа улам нэмэх шаардлагатай болно гэж Пармершвар Рамлоган үзэж байна.

“Засгийн газрын зарлага дахин нэмэгдвэл инфляцийн дарамтыг улам ихэсгэнэ. Одоо ч гэсэн инфляцийн дарамт их байна. Эдийн засаг хурдан тэлж, хэт халж байна. Энэ үед Засгийн газрын зарлага нэмэгдвэл дотоодын үйлдвэрлэлийн бараа бүтээгдэхүүний нийлүүлэлт, хэрэгцээг хангаж чадахгүй инфляцийг өсгөнө. Энэ нь ядуу, эмзэг бүлгийнхэнд л илүү хүндээр тусна. Тиймээс л бид төсвийн тодотгол хийхийг дэмжихгүй байгаа. Хэрэв Засгийн газар инфляцийг үл хайхран зарлагаа нэмэгдүүлвэл Монголбанк мөнгөний бодлогын байр сууриа хатууруулж, бодлогын хүүгээ өсгөх шаардлагатай болно. Засгийн газрын зарлага нэмэгдэхэд хувийн салбарынхан агших шаардлагатай нөхцөл байдал үүснэ. Энэ бол төсвийн тодотгол хийсний нэг үр дагавар... Мэдээж мөнгөний бодлогыг чангалвал зээлийн хүү өсөх нь ойлгомжтой. Зээлийн хүүг нэмвэл бизнес эрхлэгчдэд сөргөөр нөлөөлнө. Харамсалтай нь үүнээс өөр арга байхгүй. Хэрэв инфляцийн эсрэг арга хэмжээ авахгүй бол байдал улам дордож мэднэ. Гэхдээ төсвийн тодотгол хийгээгүй байлаа ч инфляцийн дарамт их байгаа болохоор Монголбанк мөнгөний бодлогоо сулруулж болохгүй.”

“Инфляци бууруулахад мөнгөний бодлогыг чангалахаас өөр арга байхгүй юу?” гэж түүнээс асуухад “Инфляци өсч, буурах гол шалтгаан нь Засгийн газрын зарлага. Тиймээс инфляцитэй тэмцэнэ гэвэл төсвийн зарлагыг л хянах ёстой. Монголын эдийн засагт төсвийн бодлогоос л бүх юм хамаарч байна. Мөнгөний бодлого ч мөн төсвийн бодлогод хариу арга хэмжээ авсан байдалтай байгаа тул инфляцийг бууруулахад төсвийн бодлогыг л хумих ёстой. Монголд мөнгөний бодлого олон зүйлийг хийж чадах боловч ганцаараа инфляцийг бууруулж чадахгүй. Инфляцийн эсрэг хамгийн түрүүнд төсвийг бодлогыг хумиж тэмцэх ёстой” гэж хариулав.

Тэрбээр мөн, эрдэс баялгийн дэлхийн зах зээлийн үнээс шууд хамаарч төсвийн бодлого тодорхойлогдож байсныг болиулахын тулд УИХ Төсвийн тогтвортой байдлын тухай хуулийг баталсан. Энэ хуулийн гол санаа бол дэлхийн зах зээл дээр эрдэс баялгийн үнэ өндөр байхад Засгийн газар зарлагаа нэмэлгүй, хуримтлал үүсгэнэ. Харин эрдэс баялгийн үнэ унаж, улсын төсвийн орлого багасахад, хуримтлуулсан хөрөнгөө ашиглаж, төсвөө танах шаардлагагүй байхад оршино гээд “Гэтэл энэ жил Засгийн газар тэртэй тэргүй алдагдалтай баталсан төсөвтөө тодотгол хийх гээд байгаа нь 2008 хямралын өмнөх үеийг санагдуулж байна” гэв.

Х. ЭРДЭМБИЛЭГ